



Om Blitsposte ontvang, stuur 'n e-pos na [bladuitleg@nhk.co.za](mailto:bladuitleg@nhk.co.za) of [grafies@nhk.co.za](mailto:grafies@nhk.co.za) en versoek dat u naam op die versendingslys geplaas word.

Nuus, berigte en kort kommentaar (uiters 100 woorde) aan [produksie@nhk.co.za](mailto:produksie@nhk.co.za)

Webblad van die Hervormde Kerk [www.nhka.org](http://www.nhka.org)

Die redaksie aanvaar verantwoordelikheid vir die inhoud. Menings deur skrywers uitgespreek, is egter nie noodwendig die beleid of standpunt van die Hervormde Kerk nie.

## Ons leef in God se teenwoordigheid

**Kom saam, dan sal julle sien, kom kyk, leef in die lig, laat jou deur Jesus vind, ontvang die lewe in oorvloed. Dit was die uitnodiging deur die prediker, dr Thinus van Staden (voorsitter van die Kuratorium), aan die teologiestudente en ander gaste tydens die opening van die Hervormde Teologiese Kollege (HTK) op 14 Februarie vanjaar.**

Uit die Johannes-evangelie is temas van lig, lewe, om te sien, te vind, gevind te word, uitgelig, as temas wat belangrik is vir ons lewe as volgelinge van Jesus, om ander deur die manier waarop jy leef en optree iets van Jesus te laat sien, hulle in te nooi in Jesus se teenwoordigheid, hulle na Jesus toe te bring.

Hierdie uitnodiging is gerig in die konteks van die opening van die HTK binne die ruimte van die teologiese opleiding aan die Universiteit van Pretoria se Fakulteit Teologie en Religie. Dit is 'n fakulteit wat gereken word as een van die beste teologiese fakulteite in ons land. Binne hierdie ruimte word die studente toegerus om uit te gaan in die wêreld met die boodskap: *Kom kyk, sien, daar is die Lam van God.*

Tydens die geleentheid het ds Marina Kok-Pretorius 'n referaat gelewer met die titel '*Ruimtelike perspektief op Boek IV van die Psalms: Herinnering en verbeelding in Psalms 90-92 en Psalms 105-106*' (sien 'n volgende uitgawe van *Die Hervormer* vir die referaat). Die referaat belig die fokus van haar PhD-proefskerif. Sy toon aan dat betekenis toegeken word aan ruimtes op grond van gebeure en herinneringe, en dat herinneringe nie net gekoppel is aan fisiese plekke nie. *Ons herinneringe neem ruimte op in ons gees/verstand/bewussyn – onthoude ruimte woon eindelik in ons harte en verstand.* Geloof funksioneer binne hierdie sfeer van onthoude ruimte.

Uit die genoemde Psalms toon sy aan hoe Israel in die nadraai van die ballingskap poog om hul lewens te rekonstrueer. In hierdie proses onthou hulle YHWH (God) se getrouheid en liefde. Hierdie sekerheid van God se sorg en liefde maak dat hulle 'n toekoms gevul met hoop en redding kan sien.

Die geleentheid het vir my die fokus geplaas op identiteit en lewe wat gevind word in God se teenwoordigheid. Om te onthou wie God is, die Een wat deur Jesus ons wêreld binnekomen het, en deur die Gees steeds in, om en by ons woon. Ons roeping is om in die Lig, vir die Lig te leef, en ander na die Lig toe te bring.

In hierdie lewe is onthou belangrik. In die warboel van die lewe, te midde van alles wat met en om ons gebeur, vergeet ons dikwels wie ons is: mense van die Lig, wat reeds hier en nou die waardes van God se koninkryk behoort te leef. In dit alles, is dit bo alles belangrik om te onthou wie God is, die Een wat was, die Een wat is, die Een wat weer kom. Dit is in die saam onthou en saam leef in die ruimte van God se Lig en Liefde dat ons 'n toekoms gevul met hoop en redding kan sien.

## Lief en leed

- **Rousseau Nel**, broer van ds Bernard Prinsloo van Gemeente Onverwacht se vrou, Lize, en kleinseun van prof Malan Nel, is die afgelope naweek oorlede. Ons innige simpatie gaan aan sy naasbestaandes.
- **Mev AG (Annetjie) van Schalkwyk**, weduwee van ds JG (Jan) du Plessis wat op 28 Augustus 1968 oorlede is, is op 7 Februarie oorlede. Ons innige simpatie gaan aan haar geliefdes.
- **Ds Carel Johann de Bruin (emeritus)**, sekretaris van die Komitee vir die Argief, Museum en Biblioteek, sterk tans aan na sy galblaasoperasie van Vrydag 16 Februarie. Ons bid hom algehele herstel toe.
- **Gemeente Potchefstroom-Studente** neem op Sondag 25 Februarie om 17:30 afskeid van **prof Rudy en Terzie Denton**. Prof Denton is met ingang van Februarie 2024 aangestel as medeprofessor in Praktiese Teologie aan die Noordwes-Universiteit.
- **Die volgende predikante verjaar tot 1 Maart, en word hartlik geluk gewens:**



Ds Carel Johann de Bruin



Prof Rudy Denton

- Vrydag 23 Februarie: Dr EH (Estelle) Dannhauser (63) (siekte-emeritaat) en ds N (Natasha) Loftus (30) (Barberton/Nelspruit)
- Saterdag 24 Februarie: Dr AG (André) Ungerer (64) (HTK), di JH (Jan) Prinsloo (82) (emeritus) en JD (Daniel) Steinmann (63) (Windhoek)
- Sondag 25 Februarie: Di H (Hennie) Aucamp (75) (emeritus) en CB (Bernard) Prinsloo (36) (Onverwacht)
- Maandag 26 Februarie: Ds M (Monja-Lize) van Belkum (45) (Seestergemeente Brackenhurst)
- Woensdag 28 Februarie: Di A (Anneline) Geyer (49) (Kempton Park-Oos) en HP (Herman) Meyer (47) (Carletonville)
- Donderdag 29 Februarie: Ds A (Anienka) Jansen van Rensburg (36) (Leeudoringstad)
- Vrydag 1 Maart: Ds Y (Yolandé) de Lange (41) (El-Flora)

## Gemeentes en bediening

- Die **Boekwinkel** by die Sinodale Dienssentrum (Derdepoort) sal **gesluit** wees van **4 tot 6 Maart** vir voorraadopname.
- **Ds JZ (Hans) Britz** van Gemeente Standerton het 'n beroep ontvang na Eendracht. Hy het die beroep aangeneem en word op 17 Maart daar bevestig.
- **Prop DA (Dirk) van Rooyen** (beroepafwagtend) het 'n beroep ontvang na Tarlton (deeltyds).



Ds Hans Britz



Prop Dirk van Rooyen

**Ds Peet Esterhuizen, Fondssekretaris van die Teologiese Opleidingsfonds, skryf soos volg:** "Jurie Els se liedjie *Hoe sê mens dankie?* skiet my gedagtes binne as ek namens die Teologiese Opleidingsfonds en die begunstigdes uit die Fonds die afgelope jaar wil dankie sê vir u waardevolle bydraes. Dankie aan al die ringe, kerkrade, NHSV takke en individue, julle wil ons nie vergeet nie. Jul waardevolle bydrae tot die Teologiese Opleidingsfonds in die finansiële jaar wat 29 Februarie 2024 sluit, het harte bly gemaak en lewendsrome in vervulling laat gaan. U bydrae het gehelp om ons studente te ondersteun in hul teologiese studies en kollegas met hul nagraadse studie in die Teologie. Indien daar nog skenkings gemaak wil word – byvoorbaat baie dankie daarvoor. Die bankbesonderhede is soos volg:

### **Teologiese Opleidingsfonds**

### **ABSA Bosmanstraat**

**Rekeningnommer: 4048632649**

Vir enige verdere navrae, kontak my gerus: Peet Esterhuizen, Fondssekretaris, by [peet.estherhuizen@gmail.com](mailto:peet.estherhuizen@gmail.com) of 082 764 2622."

- **Gemeente Montana-Oos: Vakante pos vir voltydse orrelis.** Belangstellendes kan hul CV stuur aan die skriba, oudl Johan Emmenis, by [johan.emmenis@gauteng.gov.za](mailto:johan.emmenis@gauteng.gov.za) of kontak hom by 060 546 7438 of vir Susan Schoonbee by 082 411 5464 tydens kantoorure (08:30-12:00). Die voordele sal met die kandidate bespreek word. Die kerkgebou is geleë in Kameeldriftweg, Derdepoort, Pretoria (Roodeplaatdam/Kameeldrift-Oos-area).

## Vergaderings

- Donderdag 22 Februarie: Pensioenvergadering  
Redaksie van *Die Hervormer*
- Vrydag 23 Februarie: Raad van Finansies
- Dinsdag 27 Februarie: NHSV Studielengskomitee  
Teologiese Opleidingsfonds
- Donderdag 29 Februarie: Kommissie van die AKV
- Vrydag 1 Maart: Kommissie van die AKV

## Kerklike publikasies



## 'n Gedig

### Gebed vir dié in die wêreld


*Vir Marié Opperman*

Dat ons leef omdat U leef is die eerste  
van alles wat wonderlik is.  
'n Wisselvloei is daar tussen U en ons.  
U vloei in ons in en ons in U, en in U word  
ons arme vog gesuiwer en vernuwe,  
en ons self keer uit U terug in ons in  
deur die membraan wat tyd en wêreld is.  
Membraan of illusie, so dun is dit, so nie,  
so nêrens vir u begenadigdes –  
Dankie dat ons wat onsself versteek vir ons naastes  
gans oop is vir U en U oop.  
Dankie vir die gladder as asemhaling heen en weer  
tussen U en ons; dat tyd en ewigheid  
mekaar deurdring, nie twee is nie maar een.  
Dankie, God, vir dié wonder, waarin die harde seer  
wat wêreld is, sagter as asem oplos en verdwyn.

**Sheila Cussons**  
(Uit: *Membraan*, 1984)

## Toerusting

- **40 liedere vir die 40 dae Lydenstyd.** Vanaf Woensdag 14 Februarie is daar elke dag 'n nuwe opname van 'n gepaste kerklied waarna jy kan luister om jou meelewing tydens die Lydenstyd te verdiep. Die musiek is opgeneem in Gemeente Pretoria-Oos. Klik net hieronder en luister dag vir dag saam soos ons die pad na Golgota stap. As jy die lied-vir-die-dag daagliks via WhatsApp wil ontvang, stuur gerus jou selnommer na 072 041 3954. Klik [hier](#).



**Gevorderde Toerusting Ouderlinge met tema: Ek glo!**

Vind plaas op  
12 en 26 Maart 2024 om 19:00

Aanbieder –  
Dr Deon du Toit

<https://us02web.zoom.us/j/9427689935?pwd=d3d3KINlcDU0a1plZCtjSS9ZSFY4dz09>  
Meeting ID: 942 768 9935  
Wagwoord: SGB

## Barmhartigheid

- **Machteld Postmus-behuisingkompleks vir bejaardes in Brooklyn, Pretoria,** beskik oor die volgende:
  - Tweeslaapkamer-woonregeenheid beskikbaar by Frans Boshoff teen R465 400.
  - Eenslaapkamer-huureenheid beskikbaar by Huis MacIntosh teen R5 330 (krag ens uitgesluit).Kontak mev Hannelie Fourie by 012 325 1857 x216 vir meer inligting.
- **Louis Trichardt-behuisingkompleks vir bejaardes** in Danville, Pretoria, bied kamergewe met twee etes per dag teen R3 850 per maand. Vir meer inligting, kontak mev Yvonne Willemse of matrone Jenny Wesson by 012 386 5310.
- **Ons Tuis (Andries Marié Oosthuizen) in Parys** het plek beskikbaar in die tehuise vir versorging van verswakte bejaardes teen R9 760 per maand. 'n Volledige versorgingsfasilitet sluit in 24-uur-versorging, drie maaltye per dag en sekuriteit. Behuisingsfasilitete teen R5 990 per maand is ook beskikbaar op dieselfde perseel; dit sluit drie etes en weeklikse wasgoed en skoonmaak van kamers in asook gratis deelname aan sosiale programme. Vir meer besonderhede, skakel matrone Teresa Broodryk by 056 811 2185.
- **Seniordal-aftreeoord** is die eiendom van die NHKA se **Gemeente Pretoria** en spesialiseer in lewensregverkope en verhuring aan selfversorgende persone ouer as 55 jaar. Die oord is geleë in die veilige omgewing van Rietondale in Pretoria. Seniordal beskik oor 24-uur-veiligheidsdienste en toegangsbeheer, en bestaan uit die volgende woonstelle:

Eenslaapkamer: R515 000  
1½-slaapkamer: R520 000  
Tweeslaapkamer: R560 000

Kontak Salomie Stolz by 012 329 4313 of 083 308 0520 (08:00-12:00) vir meer inligting.

- **Herfsakker Selfsorg-aftreeoord in Groblersdal:** Behusing beskikbaar vir persone ouer as 60. Geen versorging beskikbaar nie, persone moet selfversorgend wees. Geen etes word voorsien nie. Eie tuin. Tariewe is per vierkante meter en verskil van huis tot huis. Deposito van twee maande huur betaalbaar. Vir meer besonderhede, skakel Frik Rossouw by 082 830 6591.

- **Belfast Rusoord** bied onder meer 24-uur mediese versorging, CCTV, 24-uur-toegangsbeheer, drie gebalanceerde maaltye per dag, en aktiwiteit vir elkeen. Daar is fasilitete vir semiversorging, verswakte bejaardes, en woonstelle vir selfversorging. Kontak Riana de Villiers by 013 253 31211 / 063 663 7449 / [manager@belfastrusoord.co.za](mailto:manager@belfastrusoord.co.za) vir meer inligting en tariewe.
- **Athalia Uitreik in Bloemfontein** bied verblyf vir en versorging van bejaardes en persone met gestremdhede. Daar is enkel- en deelkamergeriewe in 'n huislike atmosfeer, verblyf met drie etes ingesluit, verblyf sonder versorging, en 24-uur-versorging. Navrae: 079 826 6363 / 084 023 0315 / 051 522 6089 / [navrae@athalia.co.za](mailto:navrae@athalia.co.za) / [www.athalia.co.za](http://www.athalia.co.za).

## Fondsinsamelings

- **Oornagfasilitete: Seniordal.** Seniordal beskik oor oornagfasilitete vir persone wat vergaderings of kongresse moet bywoon, of wat dokters moet besoek, of verblyf benodig vir familie van persone wat in die hospitaal is. Daar is veilige parkering en 24-uur-sekuriteit. **Vir navrae oor tariewe en vir besprekings**, kontak Salomie Stolz gedurende kantoorure 08:00-12:00 by 012 329 4318, of na ure by 083 308 0520.

## Studentesake

- **Studentebehuising. Gemeente Stellenbosch** kan veilige behuising op die kerkterrein en op die kampus aan studente verskaf. Dit bestaan uit óf enkelkamers met gedeelde fasilitete, óf eenmenswoonstelle. Skakel dr Chris le Roux by 079 495 3239 of stuur 'n e-pos na [stellenbosch@nhk.co.za](mailto:stellenbosch@nhk.co.za) vir meer inligting.
- **Studentebehuising. Gemeente Philadelphia** verskaf aan studente veilige behuising by Fleur de Lis op die kerkterrein. Dit bestaan uit enkelkamers met gedeelde fasilitete. Die behuising is binne stapafstand van die kampus en winkelsentrums. Skakel dr Sanrie de Beer by 083 226 1866 of stuur 'n e-pos na [nhkphiladelphia@gmail.com](mailto:nhkphiladelphia@gmail.com) vir meer inligting.

## Om oor na te dink

*'n Studie van 2022 wys sowat 10 000 kinders in ons land sterf jaarliks vanweë wanvoeding en hongerte. Wat 'n godskreiente aanklag is dit nie. In hoofsaak teen wie? Hóé sterf 'n kind van honger? ... Terwyl die Inkwazi-restaurant op die presidentsvliegtuig spyseniering lever teen R24 000 per kop. Dis somme wat my kop laat tol. (Annelie Botes, Beeld, Dinsdag 20 Februarie 2024)*

## Betaalde advertensies in hierdie nuusbrief

**Advertensies waarvan 'n private individu of instansie die begunstigde is, of waarin 'n gemeente 'n projek prominent wil bekendstel, kan in hierdie nuusbrief geplaas word.** (*Tekskennisgewings van gemeentes is gratis.*) Indien 'n jpg-weergawe van die advertensie voorsien word, moet dit 15,5 cm breed x 6,5 cm hoog wees, resolusie 1878 x 815 pixels, 150-300 dpi.

Stuur die voorgestelde **teks van nie meer nie as 75 woorde** met of sonder eenvoudige grafika of 'n foto saam met die bewys van betaling aan mev Tessa Oppermann, per e-pos na [produksie@nhk.co.za](mailto:produksie@nhk.co.za). GEEN advertensie sal geplaas word sonder die betalingsbewys nie.

Die **teks en bewys van betaling** moet mev Oppermann bereik teen 16:00 op die Maandag voor die betrokke uitgawe se verskyning. *Blitspos* word normaalweg die Woensdagoggend afgehandel en teen die middag op die webblad gelaai. Indien die plasing meer as een keer moet geskied, moet aangedui word op watter datums dit moet verskyn, met betaling vooruit vir al die beoogde plasings.

**Die koste is R250 per plasing (BTW ingesluit).** Die verskuldigde bedrag moet uitgemaak word aan die Raad van Finansies, ABSA tjkrekening nommer 020-000-287, takkode 632-005, verwysing: u naam + Blitspos. Neem kennis dat die redaksie in uitsonderlike gevalle mag besluit om 'n advertensie nie te plaas nie en die adverteerder se geld terug te betaal.

## Gebed vir die Lydenstyd

Liefdevolle Vader,  
gedurende hierdie heilige Lydenstyd,  
bring my nader aan U.  
Berei 'n plek in my huis en my hart  
vir stilte en afsondering,  
sodat ek die gawe kan herontdek  
van 'n lewe gevul met gebed.  
Help my om die dinge af te lê  
wat die welstand van my liggaam en gees bedreig  
en herinner my dat daar vrede kan wees  
in 'n lewe van eenvoud.  
Verruim my hart om te gee  
aan diegene wat nood ervaar,  
sodat ek ook so die genade kan herontdek  
van dankbaarheid en vrygewigheid.  
Mag hierdie kosbare tyd gevul wees met u genade,  
sodat my liefde vir U en my geloof in U  
sterker as ooit kan ontvlam.  
Amen.

[churchhopping.weebly.com](http://churchhopping.weebly.com)

(Afrikaanse verwerking: Tessa Oppermann)

